

Mateo 6:19-34

Siñansa tokante rikesa

19.

19.No montoná rikesa riba mundu kaminda mot i frus ta kome nan i ladron ta kibra drenta horta nan.

20.Montoná rikesa den shelu, einan ni mot ni frus no por kaba ku nan, ni ladron no por kibra horta nan.

21.Pasobra kaminda bo rikesa ta, einan bo kurason ta.

Wowo ta manera un lampi pa kurpa

22.Wowo ta un lampi pa kurpa; kemen si bo wowo ta salú, henter bo kurpa ta yená ku lus.

23.Si bo wowo ta malu, henter bo kurpa ta den skuridat. Anto si e lus den bo ta skuridat, esta un skuridat teribel esei ta !

No por sirbi dos shon

24.Niun hende no por sirbi dos shon, pasobra lo e odia esun i stima e otro. Lo e pega un na su kurason i menospresiá e otro. Ta imposibel pa sirbi Dios i plaka tambe.

Siñansa tokante nesesidat i problema di tur dia.

25.Mi ta bisa boso: No preokupá pa boso bida, esta si boso tin di kome of di bebe. Ni tampoko si boso tin paña pa bisti. Akaso bo bida no ta bal mas tantu ku un kuminda i bo kurpa mas tantu ku paña ?

26.Wak e paranan den laria; nan no ta sembra ni kosecha, ni nan no ta warda nada den un mangasina. Ta boso Tata den shelu ta duna nan di kome ! Boso no ta bal mas tantu ku para?

27.Ni maske kuantu boso preokupá, ta kua di boso lo por rèk su bida un krenchi ?

28. I pakiko boso ta preokupá ku bishmentu? Paga tinu kon e flornan di mondi ta krese. Nan no ta hasi trabou ni traha tela.

29. Sinembargo Ami ta bisa boso ku ni rei Salomon den tur su grandesa no tabata bisti mes bon ku un din nan.

30. Si Dios ta bisti flornan di mondi ku awe t'ei ma mañan ta bai tirá den fornu, bunita asina, kuantu mas lo E bisti boso, hende di poko fe.

31. P'esei no preokupá i puntra : “ Kiko nos mester kome? Kiko nos mester bebe? Kiko nos ta bisti?

32. Pasobra ta paganonan ta kore tras di tur e kosnan aki. Boso Tata den shelu sa ku boso tin mester di tur e kosnan aki.

33. Buska reino di Dios i buska pa hasi su boluntad promé i boso ta haña tur e sobrá kosnan aki aserka.

34. Pues, no preokupá pa e dia di mañan, pasobra e dia di mañan ta preokupá pa su mes problemanan. Kada dia tin su suficiente problema di su mes.